



6. oktoberi 2016

UKA2016/46

Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Múte B. Egede, Inuit Ataqtigiit)

Inatsisartunut ilaasortaq Múte B. Egede Inuit ataqtigiit Inatsisartunut aalajangiiffigisassamik siunnersuuteqarpoq, tassalu Kalaallit eqqumiitsuliaannut saqqummersitsiveqalernissaanik tamannalu oqaaseqarfigissavarput.

Inuiaat sumiluunniit tarnikkut timikkut anersaakkullu nukittuumik inissisimassappata pinngitsoorneqarsinnaanngilaq inuit kulturikkut suliniutillit tamakkiisumik tapersersornissaat, tamannalu nukiuvoq kinaassuseqartitsisoq inuiannut kalaallinut tamannalu aamma avammut sunniuteqartaqaaq kalaaliussuserput ersarissisilluortarlu.

Nunatsinni piorsarsimassutsikkut sanngisuumik inissisimanissarput kalaallinut inuiaqtigiinnut pingaaruteqarluinnartoq siuarsartuariaqartorlu Partii Naleqqamiit isumaqarluinnarpugut pingaartumik ukiuni makkunani oqaatsitta kinaassutsittalu nukittoriartorfianni.

Inuiaammi timikkut tarnikkullu nukittuut pilersinneqassappata inuiaassutsitta oqaatsittalu ersarissartuarnissaat atorneqarnissaallu kalaallinut inuiannut isumalerujussuummat, taamaattumik inuiaat kalaallit oqatsigullu illersussagutsigit atorneqarneri annertusartuariaqarpagut ulluinnarni sulinermi ataatsimiinnermi minnerunngitsumillu tusagassiorfinni aammalu inuiaqtigiit suliffiutaanni tamani.

Partii Naleqqamiit pingaarluinnartutut isigaagut aamma makku pitsaasumik tunngavissaqarlutik ingerlalluarnissaat, isiginnaartitsinikkut, nipilersornikkut, atuakkiornikkut, sanaalunnikkut, eqqumiitsuliornikkut, filmiornikkut, erinarsornikkut, tivanikkut, qimussernikkut, qajartornikkut, mersornikkut assarsornikkullu, minnerunngitsumillu aamma nipilersornikkut saqqummersitsisarnerit annertusarneqarnissaat, tassami oqaatsitta aamma kinaassuserpullu nukittunerulissappat nipilersornerit siammarterluartariaqarput, tamakkuninngalu aamma suliaqartartut eqqarsaatigissagaanni tapersersuinerusariaqarnerput annertusartariaqarluinnarpoq.

Inuiaat kalaallit amerlanngikkaluaqaluta kulturimut tunngasunik nukittuffeqarpugut, piginnaanilippassuarnik peqarpugut tunniussassaqaqarlutunik nunatsinnut nunattalu avataanut, tamakkulu maani annerusumik nunatsinnullu iluaqutaanerulissappata taava saqqummersitsinerit aammalu eqqumiitsulianik katersugaateqarnissaq pikkoriffiginerusariaqarparput, tassami pitsaasumik taamatut suliniuteqarutta nunatsinnut aningaasarpassuarnik iluanaarfiusinnaammatt.

Taamaattumik nunatsinni eqqumiitsuliornikkut piginnaalippassuit periarfissaat kinaassutsittalu avammut nittarsaanissaa annertusassagutsigu eqqumiitsulianik saqqummersitsiveqalernissamik pilersitsisinnaaneq soqutiginarluinnarpoq Partii Naleqqamiillu isuma tapersorsorparput.

Takornarissat amerlasuut tikissappata taava periarfissat ussasaarutigisinnaasagut amerlisartuartariaqarpagut, taakkunungalu ilaalluinnarpoq eqqumiitsuliornikkut saqqummersitsisarfiit, aammalu inuit assiginngitsorpassuit piginnaasallit ingerlatsisullu nukittorsaaffiginissaat atorluarneqarnissaallu.

Namminersorlutik oqartussat, kommunit, Inuiaqatigiit maani suliffeqarfiutigut minnerunngitsumillu kultureqarnikkut ingerlatsisut isuma una soqutiginarluinnartoq tapersorsortariaqaraat isumaqarluinnarpugut.

Kiisalu ilanngullugu eqqarsaatitut apuunniarparput eqqumiitsuliortunut ukiup naanerani akileraarutigut akiligassiisarneq nalilersoqqullugu, tassami akiligassat ataatsikkorsuaq nassiunneqaraangata asuut akiliiniarnerminnut ajornartorsiortarmata tamaana eqqarsaatissatut Naalakkersuisunut apuupparput.

Taamatut oqaaseqarluta Múte B. Egede siunnersuutaa soqutiginarloq tamakkiisumik tapersorsorparput kultureqarnermullu ataatsimiititaliami suliarineqarnissaa innersuussutigaarput.

Hans Enoksen